



partii naleraq

10.Oktober.2017

UKA2017/30

Uummannap talittarfiani aserfallatsaaliuisoqarnissaa ujaqqanillu nunniukkamik malinnut illersuusiortoqarnissaa pillugu AI 19-imut salliutitseqqullugit Naalakkersuisut peqquneqarnissaannik Inatsisartut aalajangiiffigisassaattut siunnersuut (Inatsisartunut ilaasorta, Jess Svane, Siumut)

Uummannap talittarfiata nutarterneqarnissaa pillugu, Naalakkersuisut salliutitseqqullugit peqquneqarnissaannik inatsisartut aalajangiiffigisassaattut, siunnersuut Jess Svane-mit siunnersuutigineqartoq Partii Naleqqamiit imatut oqaaseqarfigissavarput.

Siunnersuuteqartup eqqortumik oqaatigaa Uummannap talittarfia atorneqarnermigut, angissutsimigut, isumannaallisaanikkullu naleqqukkunnaarsimasoq.

Uummannallu illoqarfittaata inoqqortusiartornera eqqarsaatigalugu, Uummannap nunataata kujataatungaata kitaatungaani kangerlunnguaq umiarsualivissatut aamma misissullaqqunarpoq, umiarsuit pajuttaatit, takornariartaatillu talittarfissaattut eqqarsaatigalugit, massakkullu Uummannami talittarfik aalisarnermut suliffissuaqarnermullu annerusumik atorneqalersinnaanera eqqarsaatigineqarsinnaanersoq, tassami aalisarnikkut aammalu aalisakkanik suliffissuaqarnikkut siuariartorneq annertuumik ingerlanneqarmat.

Uummannamilu siuariartorneq suli siunissaqartoq qularutissaanngimmat tassami eqqaani pisuussutit uumassusillit iluamik suli atorneqanngitsut arlaqassammata soorlu saattussat il.il

Tamakku tamaasa eqqarsaatigalugit Uummannap talittarfeqarnikkut siuarsarneqarnissaa avaqqunneqarsinnaangilaq, Naalakkersuisoqatigiit isumaqatigiissutaat aallaavigalugu Nunarput naligiinnerusumik siuarsarneqassasoq isumaqatigiissutaavoq, taamaaliornikkut isumaqatigiissut timitalersorneqassagaluarimat illoqarfiit annersaat kisiat aallaaviginagu, Nunarpulli tamaat ataatsimut isigalugu naligiissaarisoqalissagaluarimat.

Taamatut oqaaseqarluta siunnersuut aappasaaniinnginnerani ataatsimiititaliamut susasaqartumut innersuupparput, ataatsimiititaliallu sulilluarnissaanik kissaallugu.

Qujanaq

Henrik Fleischer